

**Efesus 5:22-24 Bine kodu atoro' ka lakena akadi se atoro' ka Pangeran. 23 Sabab lake paneka ngapalae bine, akadi Almasih se daddi kapalana jema'adda, ban Salerana dibi' jugan Rato Panyalamet monggu ka jema'at se daddi badanna Salerana. 24 Akadi jema'at se atoro' ka Almasih, sapaneka jugan e dhalem parkara ponapa'a bai bine kodu atoro' ka lake.**

**Efesus 5:31,33 E dhalem Alketab esebuttagi, "Lantaran jareya lalake' bakal adina'agiya rama ebuna kaangguy daddi settong ban binena, ban se kadhuwa jareya bakal daddiya settong." 33 Nangeng ayat gapaneka badha hubunganna jugan sareng sampeyan: saneyap lake kodu taresna ka binena akadi taresnana ka aba'na dibi', ban saneyap bine kodu aehteyar sopaja hormat ka lakena.**

**1 Korintus 7:3-5 Lalake' kodu neptebbi kawajibanna menangka lake ka binena; dineng babine' masthe neptebbi kawajibanna menangka bine ka lakena; se kadhuwa kodu neptebbi kawajibanna bang-sebang se settong ka settongnga. 4 Oreng se daddi binena oreng ta' andhi' kobasa pole ka badanna; se kobasa ka badanna ganeka se lake'. Sapaneka jugan lakena oreng ta' kobasa ka badanna; se kobasa ka badanna ganeka se bine'. 5 Oreng alake-bine ta' kengeng saleng majau. Mon coma sabatara, kengeng saos, sokor se kadhuwa ampon padha mopakat, kalaban maksod sopaja se kadhuwa padha bisa adu'a ta' kalaban olle gangguwan. Nangeng samarena ganeka, se kadhuwa kodu padha saleng nyemma'e pole menangka oreng alake-bine. Mon bunten, sampeyan bisa norodi pangajagga erroh jahat, sabab sampeyan padha ta' kellar ngampet napso.**

**1 Korintus 7:34 daddi pekkeranna oca-pecca. Babine' se ta' alake, otabana paraban, bakal bannya'a mekkere ra-parkara se badha hubunganna ban Pangeran, sabab babine' ganeka terro sopaja badan sareng sokmana daddi kaagunganna Jehovah. Nangeng babine' se ampon alake, pekkeranna masettong ka barang parkara dunnya paneka, sabab aba'epon terro masennengnga atena lakena.**

**Kolose 3:18 Tan-taretan se padha daddi rajina oreng! Patoro' oca' ka rakana, sabab oreng Kristen kodu sapaneka.**

**1 Timotiyus 2:11-15 Babine'an kodu ajar ta' acaca'an ban kodu toro' oca'. 12 Sengko' ta' abendherragiya babine'an ngajar otaba marenta lalake'an; babine'an kodu neng-enneng. 13 Sabab Adam ecepta'agi kaadha', saellana jareya buru Hawa. 14 Ban banne Adam, tape babine' jareya se ekenneng tepo, sampe' nerrak laranganna Jehovah. 15 Tape maske bariya babine' bakal salamedda kalaban alahirragi ana', sokor aba'na teptep andhap asor parcaja ka Almasih ban teptep taresna ka oreng laen sarta odhi' malolo ngabdi ka Jehovah.**

**Kadaddiyan 3:16 Saellana jareya GUSTE Jehovah pas adhabu ka babine' gella', "Mon ba'na teppa'na ngandhung bi' Sengko' epatamba'a malarat, mon rembi'a**

**epasajana sake'. Maske kantha jareya ba'na gi' bakal pagguna barai ka lakena, ban ba'na bakal ekobasa'ana lakena jareya."**

**1 Petrus 3:1-6 Sapaneka jugan sampeyan, babine'an, kodu toro' oca' ka lakena sopaja manabi badha reng-oreng se ta' parcaja ka berta dhari Jehovah, tengka gulina sampeyan bisa ngoba reng-oreng ganeka kantos daddi parcaja. Sampeyan ta' parlo ngoca' pa-ponapa, 2 sabab reng-oreng ganeka nengale tengka gulina sampeyan se morne sareng socce. 3 Raddinna robana sampeyan ja' pera' raddin e lowar, akadi ompamana carana ngeyas aba', otabana ngagem pareyasan, otabana ngagem rasogan se rang-larang. 4 Sabaligga, raddinna sampeyan kodu dhari dhalem ate, buddi se alos sareng ayem; ganeka raddinna roba se langgeng se sanget raja argana e dhalem pangoladanna Jehovah. 5 Kalaban cara se kadi gapaneka gi' jaman lamba' babine'an se esto ka agamana sareng se ngarep ka partolonganna Jehovah maraddin aba' kalaban toro' oca' ka se lake'na. 6 Sara sapaneka jugan, toro' oca' ka Ibrahim, sareng nyebbut lora ka Ibrahim. Samangken sampeyan paneka tra-pottrana Sara mon sampeyan ngalakone sadaja se sae sareng ta' tako' ka ponapa'a saos.**

**Titus 2:1-5 Tape ba'na, Titus, kodu ngajarragi pangajaran se bendher. 2 La-balai lalake'an se towa sopaja padha ngampet napso, bicaksana ban odhi' kalaban cara se patot ehormadi oreng. Reng-oreng jareya kodu neggu'i pangajaran se bendher dhari Jehovah, samporna kataresna'anna ka sasamana ban sabbar sarta kowat e dhalem nanggung kasangsara'an. 3 Bariya keya ba'na kodu lamiae babine'an se towa sopaja atengka se pantes monggu ka babine' se socce odhi'na. Ta' olle metenna oreng laen, ta' olle katagiyen nom-enoman kerras. Babine'an jareya kodu ngajarragi sabarang se bagus, 4 sopaja kalaban jareya bisa ngajari babine'an se ngodha kaangguy taresna ka lakena ban ka na'-ana'na, 5 daddi bicaksana, odhi' socce, ban daddi bine se becce' ban toro' oca' ka lakena; daddi tadha' oreng se nyale berta dhari Jehovah reya.**

**1 Korintus 11:5-7,10 Ban mon oreng babine' e bakto adu'a otaba e bakto manapa' berta dhari Jehovah e adha'na oreng se bannya', ta' aburgu'an, babine' ganeka ya-nyeya lakena se daddi kapalana aba'na. Ganeka padha saos sareng manabi babine' ganeka ecokor obu'na. 6 Sabab mon babine' ta' poron aburgu'an lebbi bagus obu'na egunteng. Nangeng mon babine' ecokor cethagga otaba egunteng obu'na, ganeka padha ban panyeya'an ka aba'na. Daddi, lebbi bagus babine' ganeka aburgu'an. 7 Lalake' ta' osa adhung-kodhung, sabab lalake' paneka gambaranna pribadhi sareng kaagunganna Jehovah. Nangeng babine' agambarragi kaagunganna oreng lalake', 10 Daddi, kaangguy masenneng para malaekat, babine' kodu aburgu', menangka tandha ja' aba'na badha e dhalem kakobasa'anna lakena.**

**Parompama'an - Bangsalan 12:4 Bine se becce' magumbira ban masenneng atena lakena; bine se matodhusan lakena marabut panyaket se mabucco' tolangnga.**

**Parompama'an - Bangsalan 14:1 Roma tangga epaddek bi' kabicaksana'anna babine', tape epagujur bi' kabudhuwanna.**

**Parompama'an - Bangsalan 19:13 Ana' se budhu bisa maancor eppa'na. Bine se dujan ngacepek akantha aeng se nyapcap tadha' ambuna.**

**Parompama'an - Bangsalan 21:9,19** **Enneng e padduna loteng lebbi nyaman etembang sabengko ban bine se dujan atokar.** 19 Lebbi becce' enneng e rara, etembang apolong ban bine se ngacepek ban gigir salanjangnga.

**Parompama'an - Bangsalan 25:24** **Enneng e padduna gabak anyamanan, etembang sabengko ban bine se dujan atokar.**

**Parompama'an - Bangsalan 27:15,16** **Bine se dujan atokaran akantha ojan se saare benteng toron ros-terrosan.** 16 **Bine se kantha jareya ta' kera bisa esoro neng-enneng, akantha angen se ta' ekenneng tahan ban mennya' se ta' ekenneng pergем e tanang.**

**Parompama'an - Bangsalan 31:10-31** **Bine se cakep malarat sareyanna; bine se kantha jareya alarangan dhari enten ban barleyan.** 11 **Lakena ta' kera kakorangan pa-apa, sabab la parcaja ka binena jareya.** 12 **Babine' se kantha jareya ta' tao agabay sala ka lakena, saomorra becce' ka lakena jareya.** 13 **Babine' jareya bajeng makopol rame ban buluna dumba, terros etennon tadha' ambuna.** 14 **Dhari jauna babine' jareya madhateng kakanan, padha ban se ejalannagi pal-kapalla dagang.** 15 **Gi' petteng la jaga nyadhiya'agiya kakanna saessena bengkona, sarta gi-magiya lalakon ka reng-barengnga.** 16 **Babine' jareya nyare tana pas ebelli, pas namenne kebbun anggur dhari hasella lakona.** 17 **Babine' jareya nyadhiya'agi badanna alalakona salarkellarra.** 18 **Babine' jareya tao sabbarang se elakone madhateng kaontongan; mon alalakon sampe' ce' malemma.** 19 **Bennang epente, kaen etennon.** 20 **Ta' cerre' ka oreng se kakorangan, bagus atena ka oreng se marlowagi partolongan.** 21 **Babine' jareya ta' kobater mon la mosem cellep, sabab la nyadhiya'agi kalambi panas kaangguy saessena bengkona.** 22 **Babut e bengkona gabayanna dibi', bariya keya kalambina se dhari kaen linen bungo terrong se bagus.** 23 **Lakena oreng se kalonta nyamana, sala settong dhari pamimpin e kotthana.** 24 **Kalambi ban sabbu' ekagabay, pas ejuwal ka sodagar.** 25 **Babine' jareya ehormat ban ekatako'e oreng, ta' kobater ngadhebbi bakto e budhi are.** 26 **Pacacana lemma' manes ce' alossa; ca'-oca'na bicaksana.** 27 **Mon alalakon ce' bajengnga, ta' nga-satengnga ngoros kabutowanna roma tatanggana.** 28 **Babine' jareya ehormat bi' na'-ana'na, sarta ealem bi' lakena.** 29 **"Bannya' babine' se becce',"** ca'na lakena, **"tape ba'na se paleng becce' dhari sakabbinna."** 30 **Roba se raddin ta' ekenneng parcaja, raddinna mowa bisa elang; tape babine' se ta'at ka PANGERAN pantes ealem salanjangnga.** 31 **Bales kabecce'anna, jareya babine' se patot ehormadi e mandhimman.**